

Kommunevalet 2023

Frå reaktivt til proaktivt

Samfunnet og teknologien er i ei hurtig utvikling. Å nytte seg av moglegheitene som ny digital teknologi kan gi, er heilt avgjerande for å møte utfordringane som kommunal tenesteyting står ovanfor i åra som kjem. Samstundes må ein satse på å auke kompetansen til dei tilsette i kommunen slik at ein kan gjere mest mogleg nytte av den teknologiske utviklinga.

Vi ønsker å bruke ny kunnskap og digital teknologi til å gjere våre kommunale tenester meir proaktive, individuelt tilpassa og saumlause. Vi ønsker at innbyggjarane skal ha gode opplevingar i kontakt med kommunen. Søknadsprosessar og informasjon må vere enkle å forstå og lette å nytte seg av.

Sula Arbeiderparti vil:

- at kommunen skal nytte seg av kunnskapen vi har om eigne innbyggjarar og næringsliv til å kunne utvikle tenestene våre for å møte både dagens og framtidens behov
- lage ein digital tvilling av kommunen. Arealplanar, samferdsle og utbygging kan planleggast og simulerast for å legge til rette for meir presise avgjersler. Datadrivne avgjersler kan hjelpe oss å førebu ei tryggare framtid
- vidareutvikle kommunen sine digitale plattformer
- bruke digital teknologi for å gjere kommunale tenester meir proaktive, individuelt tilpassa og saumlause
- sette fokus på å sikre at alle kan følge med i den digitale utviklinga utan å falle utanfor
- jobbe for at Sula skal bli ei lærande kommune med fokus på kontinuerleg utvikling og forbetring
- at ein må sørge for å ha rutinar og prosedyrar som sikrar personvernet

Vil du vite meir?

Les heile programmet på
sula.arbeiderpartiet.no eller
bruk QR koden:



Arbeid, næringsliv og økonomi



Trygg og langsiktig økonomisk styring

I det lokalpolitiske arbeidet har dei forskjellige partia ulike løysingar. Sula Arbeidarparti meiner at vi ikkje kan sette ein prislapp på menneske, men at vi bør gi den hjelp og stønad den enkelte treng. Den einskilde innbyggjar må føle seg trygg på at dei får den hjelp og dei tenestene ein treng i dei ulike fasane av livet.

Dei siste to periodane med ordførar frå Arbeiderpartiet har vore prega av stor kommunal aktivitet, og innanfor kommunalteknisk område, oppvekst, helse og omsorg har vi fått utretta mykje bra. Skular og trygging av skuleveggar har vore prioritert.

Sula er ei kommune i vekst, samstundes er vi ei låginntektskommune. Det gjer at vi må ha god kontroll på økonomien. Dei siste åtte åra har kommunen gjennomført omfattande prosessar for å sjå på korleis ein skal organisere og drifte tenestene våre på best mogleg måte. Dette er avgjerande for å sikre innbyggjarane best moglege tenester innanfor ein berekraftig økonomi. Men vi har samstundes eit ansvar for å legge til rette for at dei som kjem etter oss får økonomisk handlingsrom og gode tenester.

Dei store oppgåvene løyser vi best saman!

Næringsliv: arbeid og verdiskaping

Sula er i hovudsak ein viktig bustad- og pendlarkommune med relativ låg arbeidsplassdekning. Likevel har vi eit variert lokalt næringsliv som sysselsett mange.

Å legge til rette for at lokalt næringsliv skal kunne utvikle seg med trygge berekraftige arbeidsplassar er ei viktig kommunal oppgåve.

Oppdaterte arealplanar, god infrastruktur og kollektivtilbod er viktig. Kommunen bør difor ha ein levande næringsplan og ha nært og tett samarbeid med næringslivet. Det er også viktig at ein passer på å unngå konflikt mellom bustad og næring, og ein må ta omsyn til dette når ein lagar kommuneplanar.

Sula Arbeiderparti vil:

- regulere areal som kan nyttast til industri og næringsføremål, og prioritere klargjering og utbygging av kommunaltekniske anlegg i område som alt er utpeika til desse føremåla
- at reguleringsplanen for Vedde - Holsneset vert utarbeidd snarast råd
- realisere ny fylkesveg med tunell mellom Vedde og Mausa
- at natur og friluftsområde i Sula må forvaltast til det beste for innbygarane i regionen
- satse meir på berekraftig opplevelsebasert økoturisme innanfor naturen sine tolegrenser
- at kommunen skal vere «Ungt entreprenørskap-kommune»
- aktivt støtte unge gründarar gjennom næringsfond og næringsstipend
- at Sula kommune skal vere ein aktiv pådrivar for næringsutvikling i regionen, i samarbeid med næringslivet
- fremje berekraftig og effektiv næringsutvikling
- realisere bygging av det nyleg regulererte Veibustkrysset
- starte reguleringsarbeidet med dei delane av Langevåg som ikkje er omfatta av sentrumsplanen
- starte opp rullering av kommunen sin Areal- og samfunnsplan



Eit godt arbeidsliv for alle

Ein av dei grunnleggjande berebjelkane i norsk arbeidsliv er faste tilsetningar og heiltidsstillingar for dei som ønsker det. Regulerte lønns- og arbeidsforhold som sikrar eit godt livsgrunnlag er viktig og difor er det naudsynt med godt samarbeid mellom partane i arbeidslivet. Organisasjonsfridom og ordna forhold må vere ei sjølvfølge. Slik er det også i Sula og vi ønsker eit arbeidsliv med plass til alle og som legg til rette for at dette kan gjerast på ein slik måte at verdiane våre kan komme fram.

Sula Arbeiderparti vil:

- at Sula skal vere ein føregangskommune og legge til rette for flest mogleg lærlingplassar innanfor alle delar av kommunen sine verksemdar
- at kommunen legg til rette for yrkeshemma slik at desse i størst mogleg grad kan ta del i arbeidslivet
- at Sula kommune ikkje kjøper varer eller tenester i frå bedrifter som ikkje har ryddige forhold for sine tilsette
- at kommunen, for å motverke sosial dumping og uryddige forhold for dei tilsette, stiller krav om tariffavtale hos kontraktørar og underleverandørar ved kommunale anbod
- fjerne ufrivillige deltidstillingar og etablere ein heiltidskultur i Sula kommune. Vi ønsker at alle kommunale stillingar i hovudsak skal utlysast som heile faste stillingar
- at vi kan prøve ut nye arbeidstidsmodellar. Ein bør sjå på moglegheitene for tidskonto og intern vikarpool med faste tilsette. Dette må skje i samarbeid med dei tilsette
- auke helg- og nattlegg for dei som arbeider turnus i kommunale verksemdar